



ATASSUT

UPA 2017/114

Mala Høy Kúko

15. 05. 2017

Nuummi inissimasussamik Nunatta inuiattut timersornikkut unammersuarterfissaannik pilersaarutip FIFA-p piunasaqaataanut naapertuuttumut aningaasalersorneqarnissaannut periarfissanik misuissuisussamik suleqatigiisitamik pilersitseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anders Olsen, Siumut)

Inatsisartuni ilaasortaq Anders Olsen Inatsisartut aalajangiiffigisassaattut siunnersuutaanut naatsumik ATASSUT-miit imatut oqaaseqassaagut.

Siullertut Atassut-miit siunnersuuteqartoq qutsavigalugu nunatsinnut tamarmut pigititassanngorlugu timersornikkut unammersuarterfissamik siunertalimmik pilersitsinissamut suleqatigiissitaliornissaq ataqatigiissaarluarneqariarpat isumatusaartutut nalillerlugu taperserparput, taamatullu pilersitsinissamut eqqartuineq nalunagulu isummersoqataaffigaarput ukiut kingulliit arlaqalersut.

Naalackersuisut tapersiinnerminni ilaatigut isumagivaat peqqissaartumik tulleriissaarinermi ataqatigiissaarneqassasoq, sanaartugassarmi taama annertutigisoq Namminersorlutik Oqartussaniinnaq aningaasalersorneqarsinnaanngitsoq, taamaammallu suleqatigiissitamik pilersitsinissaq pissusissamisoorpoq ATASSUT-miit isumaqataaffigaarput, pingaartuuvorlu aningaasaleeriaatsimik torrallataasumik matumani ilusiliisoqassasoq.

ATASSUT-miit ilisimaarivarput taamatut sanaartortitsinissamut suliniutinik aallartilluareersunik nunatsinni ingerlasoqareertoq, taakkulu aamma periarfissarititaasutigut taperserneqarnissaat pissusissamisoorpoq, tassami nunarujussuarput isorartooq sumiiffinni amerlanerpaani ineriartortitseqatigiiffiunissaa pingaartitaraaput ATASSUT-miit.

Taamatut ATASSUT-miit oqaaseqarluta siunnersuut manna taperserparput, ataatsimiititalimullu susassaqtunut peqqissaartumik suliarineqarnissaa kissaatigaarput.

Qujanaq.